

摘藻堂四庫全書薈要

集部

欽定四庫全書薈要卷一萬五千五百十一

集部

劔南詩藁卷二十一

宋 陸游 撰

夜歸埽街巷書事

近坊燈火如晝明十里東風吹市聲遠坊寂寂門盡閉
只有煙月無人行誰家小樓歌惱儂餘香縹緲紫簾櫳
苦心自古乏真賞此恨略與吾曹同歸來空齋卧淒冷
燈前病骨嶢嶢影獨吟古調遣誰聽聊與梅花分夜永

馬上作

三十年前客帝城城南結騎盡豪英湖山冷落悲陳迹
文字流傳付後生衰老更禁新卧病塵埃時拂舊題名
馬頭風捲飛花過又得殘春一日晴

行在春晚有懷故隱

老辱明時乞一官逢春惆悵獨無歡舊人零落北音少
市肆蕭疎民力殫歸計已裁千箇竹殘年合挂兩梁冠
石帆山路頻回首箭茁萼絲正滿槃

儀曹直廬

春晚氣始和微雲淡朝陽開軒面小庭露漬薔薇香遊
絲卷欲盡忽復百尺長而我正遺事枕藉書一床讒波
雖稽天未遽妨人狂惟當傾綠酒莫待熟黃粱

讀書

兩兩星躔九九車天津笑我醉騎驢床頭正可著周易
架上何妨抽漢書幸有古人同臭味不嫌兒子似迂疎
頽然白髮雖堪鄙耐事禁愁却有餘

小昭慶院講僧舊在都下與之相從今沒已久見
畫像於院中作詩弔之

曩歲曾陪夜講燈伏犀插腦齒如冰假令重見應難識
遺像癯然一老僧

晨入省中偶書

清風拂畫簾初日照素壁花枝蝶小憩草葉露時滴房
櫳閒無人溝水聲激激摩挲語枯筇伴我住幽寂

春晚

今年病過春得健春欲盡更堪風雨橫紅溼樓綠潤一笑本自難造物復爾吝榆莢堆平堦柳絮飛作陣塵埃生破槥霜雪滿哀鬢平生慕陶謝著語終不近

觀潮

送劉監至江上作

江平無風面如鏡日午樓船帆影正忽看千尺湧濤頭頗動老子無桴興濤頭洶洶雷山傾江流却作鏡面平向來壯觀雖一快不如帆映青山行嗟余往來不知數慣見買符官發渡雲根小築幸可歸勿為浮名老行路

新晴馬上

一劍飄然萬里身，白頭也復走京塵。
畫樓酒旆滴殘雨，綠樹鶯聲催暮春。
絕塞勒回勲業夢，流年換盡市朝人。
此生安得常强健，小艇湘湖自采蓴。

湘湖在
蕭山縣

過六和塔前江亭小憩

斷岸孤亭日暮時，欄邊聊試葛巾欹。
偶觀挂席乘潮快，便覺懸車納祿遲。
痛飲相如無奈渴，清言叔寶不勝羸。
年來親友凋零盡，惟有江山是舊知。

春夕睡覺

破衫羸馬老黃塵人自哀
逢歲自新積雨恐侵春
甲子昏燈嬾守夜
庚申花枝影轉歌殘月
鼻鼾聲豪撼四鄰
自笑功名猶有夢
散關金鼓震函秦

送霍監丞出守盱眙

淮浦鱗鱗浸碧天
即今誰料作窮邊
空聞甌脫嘶宛馬
不見浮屠插霽煙
亭障久安無檄到
孟觴頻舉有詩傳
長城萬里英雄事
應笑窮儒飽晝眠

寄題徐載叔秀才東莊

東莊乃藏書之所

次公醒狂何必酒直諒多聞俱可友萬籤插架號東莊
多稼連雲亦何有今年偶入長安城不識貴人呼作卿
南臺中丞埽榻見北門學士倒屣迎郎官酸寒誰肯顧
君來下馬談至暮東莊雖富未可矜更要縱橫開武庫

入省

點點輕花墮綠盃翩翩羸馬犯黃埃眼邊好句等閒過
夢裏故人時一來玉塞請行狂故在霜髭自照老相催

今朝涼冷文書少
隱几南窗聽轉雷

出省

五更東帶聽朝雞
出省還家日已西
酒市雨餘青旆重
河橋風爽紫騮嘶
久慙旅飯糜倉粟
常憶新橙擣贈齏
萬事似棋聊爾耳
年來著數不勝低

和周元吉右司過弊居追懷南鄭相從之作

梁益東西六十州
大行臺出北防秋
閱兵金鼓震河渭
縱獵狐兔平山丘
露布捷書天上去
軍諮祭酒幄中謀

豈知今日詩來處日落風生蘆荻洲

尤延之侍郎屢求作遂初堂詩詩未成延之去國
因以奉送

印何累累綬若若只堪人看公何樂忽然捩柁開布駟
慰滿平生一丘壑遂初築堂今幾時年年說歸真得歸
異書名刻堆滿屋欠伸欲起遭書圍捨之出遊公豈誤
綠髮朱顏已非故請將勲業付諸郎身踐當年遂初賦
送張野夫寺丞牧滁州

皇天方憂九州裂建隆真人仗黃鉞陣雲冷壓清流關
賊壘咿嚶氣如髮逋誅猾寇入檻車北風吹乾草頭血
一龍上天三百年舊事空聞遺老說金印斗大誰作州
公子玉面蒼髯虬賦詩健筆挾風雨論兵辯舌森戈矛
別君悵飲灞橋頭長歌為君寬旅愁戰場遺迹儻可畫
尺素寄我關河秋

史院書事

是日丞相過局

信史新修稿滿床牙籤黃帙帶芸香中人馳賜初宣旨

丞相傳呼早出堂皇祖聖謨高萬古諸賢直筆擅三長

孤臣曾趣龍墀對白首為郎只自傷

紹興辛巳嘗蒙恩賜對今二十九年

矣

病中數辱曾無逸架閣見問今日忽聞徙居走筆

奉簡因致卜鄰之約

病羸不辦攬衣迎剝啄空慙扣戶聲凡藥豈能驅二豎
清心幸足制三彭巷南僦屋儻可問歲晚囊衣吾亦行
不為朝天愁路澀夜窗燈火要尋盟

喜楊廷秀祕監再入館

公去蓬山輕公歸蓬山重錦囊三千篇字字律呂中文
章實公器當與天下共吾嘗評其妙如龍馬受鞭燕許
亦有名此事恐未夢嗚呼大廈傾孰可任梁棟願公力
起之千載傳正統時時醉黃封高詠追屈宋我如老蒼
鶻寂莫愁獨弄杖屨勤來遊雪霽梅欲動

次韻和楊伯子主簿見贈

齋戒叩頭牋天公幸矣使我為枯蓬枯蓬於世百無用

始得曠快樂秋風此生安往失貧賤白髮蕭蕭對黃卷
今人雖鄰有不覲古人却向書中見猿啼月落青山空
舊隱夢寂思東蒙不願峨冠赤墀下且可短劒紅塵中
終年無人問良苦眼望青天惟自許可憐對酒不敢豪
他日空澆墳上土文章最忌百家衣火龍黼黻世不知
誰能養氣塞天地吐出自足成虹蜺渡江諸賢骨已朽
老夫亦將正丘首杜郎苦瘦帽攲耳程子久貧衣露肘
君復作意尋齊盟豈知衰懦畏後生大篇一讀我起立

喜君得法從家庭鯤鵬自有天池著誰謂太狂須束縛
大機大用君已傳那遣老夫安注脚

杜興伯高程有徽文若昏近以詩文

得名於諸公而尤與子善

簡何同叔

白髮都門客青燈夜雪時盡捐塵世事細看月湖詩格
律冰霜敵襟懷猿鶴知吾儕端後死此事要深期

去國待潮江亭太常徐簿宋卿載酒來別

昨解魚符已徑歸偶隨尺一起柴扉暫留已媿黥吾突

久住空令緇客衣外物紛紛何足問故人眷眷莫相違
從今再見應無日長與沙鷗共釣磯

醉中作行草數紙

還家痛飲洗塵土醉帖淋漓寄豪舉石池墨瀋如海寬
玄雲下垂黑蛟舞太陰鬼神挾風雨夜半馬陵飛萬弩
堂堂筆陣從天下氣壓唐人折釵股丈夫本意陋千古
殘寇何足膏磔斧驛書馳報蠻峒賊直用毛錐驚殺汝

雪夜小酌

黃昏雲齊雪意熟二更雪急聲簌簌地爐對火得奇溫
兔醢魚鱗窮旨蓄引盃且作稿面紅脫帽不管衰鬢禿
浩歌三終徐自和藏書萬卷方盡讀從來本不擇死生
况復區區論禍福雪晴著屐可登山與子一放千里目

即事

墜壁編茅養病翁五更擁褐聽霜風老雞棲冷啼偏早
宿火灰深撥更紅知我向來唯斷簡會心終竟在孤篷
東歸已賣腰間劒魯叟從今不諱窮

到家旬餘意味甚適戲書

天恐紅塵著脚深不教經歲去山林欲酬清淨三生願
先洗功名萬里心石鼎鼉羹閒煮茗玉徽零落自修琴
晚來剗有華胥興卧看西窗一炷沈

雨後復小雪

雨雪來無已冬春忽欲交賤貧安淡薄老鈍耐譏嘲村
酒兒能取農書手自鈔暮年真箇嬾屋漏旋添茆

鯉魚行

鯉魚財三尺淺水不覆脊雖懷江湖樂已歎刀几赤長
鯨之長幾千丈雪蹴山傾萬重浪縱遊不厭滄海寬一
躍已在青天上身世局促古所哀噉喁貪餌胡為哉人
間溝瀆莫更顧夜半變化乘風雷

雪夜作

雪重從壓竹竹折有奇聲雪聲亦莫埽小窗終夜明我
老尚耐冷開卷對短檠龍茶與羔酒得失不足評但思
被重鎧夜入蔡州城君勿輕癯儒有志事竟成

晨起

倦枕廉纖雨，幽窗料峭寒。溪柴旋篝火，野蕚闢登槃。年

老衣冠古，身閒宇宙寬。兒孫生我笑，趨揖已儒酸。

鄉市小把

柴謂之溪柴，蓋自耶來也。

野饋

經年倉粟厭陳陳，天遣香杭饋野人。黃耳蕈生齋鉢富，白頭韭出客盤新。此生不復營三釜，一飽何曾羨八珍。尚媿古來高士在，孟羹無糝甌生塵。

醉中浩歌罷戲書

造物小兒如我何
還家依舊一漁蓑
穿雲逸響蘇門嘯
卷地悲風易水歌
老眼閱人真爛熟
壯心得酒旋消磨
倚觀虛作窮愁想
檢點霜髯却未多

朝雨

甲夜星照泥平旦雲行西
小屋古澤中天昏雨淒淒
避溼升我堂垂翅閤老雞
所欣園中蔬冒土青滿畦
門無今雨客路滑愁長堤
一盃且復睡物理何足齊

春雨

苦雨何時止微雲又作陰
傷簷時小立隱几復微吟
枝重殘紅溼隄平漲綠深
物華元自好老病負登臨

又

春愁無處避春雨幾時晴
黯黯陰連月蕭蕭滴到明
窗昏減書課弦緩咽琴聲
何以娛幽獨新醅手自傾

記夢

夢裡都忘兩鬢殘
恍然白紵入長安
唾教紙熟修溫卷

就得驢騎候熱官紅葉滿街秋著句青樓燒燭夜追歡
如今萬事消除盡老眼摩挲靜處看

野興

紅飯青蔬美莫加鄰翁能共一甌茶舍西日紫花房歛
港北風生柳脚斜筇杖不妨閒有伴茆簷終勝老無家
自驚七十猶强健采藥歸來見暮鴉

又

鬢邊莫笑久星星造物常鍾我輩情每帶餘醒蹋花影

又和殘夢聽鴛聲軒窗風過書籤亂洲渚潮生釣艇橫
韓子未除豪氣在文章都待不平鳴

杭湖夜歸

昔如架上九秋鷹今似窗間十月蠅無復橐韃思出塞
不妨粥飯略同僧白蘋洲晚初回櫂綠樹村深已上燈
莫謂陶詩恨枯槁細看字字可銘膺

又

野艇迢迢信所之歸來常及欲昏時陂塘煙重怨姑惡

林薄月明悲子規出谷寺鐘初縹緲穿籬續火已參差
欣然笑向簷門說又了浮生一首詩

或問余近况示以長句

天亦知予嬾是真暮年乞與自由身幽尋東浦鷺迎櫂
獨卧北窗鶯喚人野卉滿頭狂取醉草廬容膝樂忘貧
死時是處堪藏骨不用要離更作鄰

估客有自蔡州來者感悵彌日

洮河馬死劒鋒摧綠髮成絲每自哀幾歲中原消息斷

喜聞人自蔡州來

又

百戰元和取蔡州
如今邊馬飲淮流
和親自古非長策
誰與朝家共此憂

初夏郊行

小硯孤吟恐作愁
長堤曳杖且閒遊
破雲山蹕千螺翠
經雨波涵一鏡秋
粃糗青紅村步市
闌干高下寺家樓
去年此日君知否
十丈京塵沒馬頭

重午

葉底榴花蹙絳繒
街頭初賣苑池冰

會稽不藏冰賣者皆自行在來世

間各自有時節
蕭艾著冠稱道陵

夏日

赤日黃塵襖襖忙
放翁湖上獨相羊
竹梢露滴驚殘夢
荷蓋風翻送早涼
暑用酒逃猶有待
熱憑靜勝更無方
空齋一榻翛然卧
閒看衣篝起篆香

睡起見楊花滿庭偶書

斷香裊裊傷窗紗睡起
魯騰日未斜堪歎一春風雨惡
今年四月見楊花

梅雨

沐罷斜簪二十冠斷雲殘靄暗江干
絲絲梅子熟時雨漠漠楝花開後寒
剝采芸香辟書蠹旋春麥麩續家餐
日長倦睫惟思閉茗椀真須抵死寬

醉歌

讀書三萬卷仕宦皆束閣學劍四十年
惡血未染鏑不

得為長虹萬丈掃寥廓又不為疾風六月送飛電戰馬
死槽櫪公卿守和約窮邊指淮淝異域視京雒於乎此
何心有酒吾忍酌平生為衣食歛版靴兩腳心雖了是
非口不給唯諾如今老且病鬢禿牙齒落仰天少吐氣
餓死實差樂壯心埋不朽千載猶可作

醉書秦望山石壁

秋雨初霽開長空夜天無雲吐白虹擘波浴海出日月
破山卷地驅雷風崑崙黃流瀉浩浩太華巨掌摩穹穹

平生所懷正如此拜賜虛皇稱放翁放翁七十飲千鍾
耳目未廢頭未童向來楚漢何足道真覺萬古無英雄
行窮禹迹亦安往聊借曠快洗我胸濤瀾屢犯蛟鰐怒
澗谷或與精靈逢黃金鑄就決河塞俘馘頡利長安宮
不如醉筆埽青嶂入石一寸豪健驚天公

秋夜

藥餌扶衰疾琴書返故園陶公方止酒樂令且清言煙
鳥宿沙際露螢明草根塵囂不到處此意與誰論

夜意

孤夢初回夜氣清
世塵掃盡覺心平
月沈洲渚漁歌遠
人語比鄰續火明
獨汲寒泉鳴細綆
靜聽漏鼓下高城
悠然坐待東方白
却看軒窗淡日生

蝸廬

小葺蝸廬便著家
槿籬莎徑任欹斜
為生草草僧行脚
到處悠悠客泛槎
孤蝶惜衣晴曝粉
穉蜂貪蜜晚爭花
有書嬾讀吾堪愧
睡起何妨自啜茶

予十年間兩坐斥臯雖擢髮莫數而詩為首謂之
嘲詠風月既還山遂以風月名小軒且作絕句

扁舟又向鏡中行小草清詩取次成放逐尚非餘子比
清風明月入臺評

又

綠蔬丹果薦瓢尊身寄城南禹會村連坐頻年到風月
固應無客叩吾門

題梅漢卿醉經堂

他人爛醉錦瑟傍君獨醉心編簡香沈酣骨髓春盎盎
如枕麴蘖羅盃觴三萬牙籤插高架五千黃卷撐枯腸
信哉名教有樂地白首不入無功鄉

得親舊書問近況以詩代書報之

溪頭日日弄潺湲敢料餘生竟得全白簡免勞中執法
青銅罷算小行年花前一笑頻開口林下深藏永息肩
欲養金丹還嬾去身今已是地行仙

放逐

放逐雖慙處士高笑談未減少年豪青山隨處有三窟
白首今年無二毛正得筇枝為老伴盡將書帙付兒曹
飲酣自足稱名士安用辛勤讀楚騷

月下野步

空中磊落斗跨天道旁荒寒月滿川行歌驚起鷗鷺眠
三萬里在拄杖邊敲門索酒太華前飛渡黃河不須船
袖中短鐵青蜿蜒昔曾巴丘從老僊削平巘崖挾雲煙
此妙可得不可傳雷聲殷殷電煜然已覺遼碣清戈鋌

雪花如席登初連歸來却看東封年

自詠

孤艇渺煙波衡門暗薜蘿衣冠醉學究

世有醉學究圖

毛骨病

維摩撫几時長喟臨觴亦浩歌無勞問蝸角蠻觸正橫戈

午睡起遇急雨

揩眼捫髯破晝眠闌邊小立獨幽然
散花雨打無飛蝶
高柳風驚有墮蟬
才畧本居元子下功名那計祖生先

今朝會意君知否目送飛雲揮五絃

夜雨暴至

堂中虛窗雨氣入堂前
散竹雨聲急山童束縕走求火
屋漏惟愁打書溼秋風擺徑九千頃

自鏡湖北際海壑地凡九千頃皆吾

鄉上腴也

此夕真成傾玉粒
蹋歌作社約比鄰一飽今年可

平揖

睡起作帖數行

睡餘得清風起坐傍書几日長誰晤言
賴此管城子欣

然共遊戲一笑我忘爾羣鴻偶下集但怪驚不起古來
翰墨事著意更可鄙跌宕三十年一日造此理不知筆
在手而况字落紙三叫投紗巾作歌識吾喜

新秋

短鬢蕭蕭失舊青此身已看作郵亭新秋無限淒涼意
盡付風蟬與露螢

秋興

去秋尚十日軒窗夕已涼露草黏溼螢壞壁啼寒螢丈

夫志四海臨書慨以慷白髮忽如此惟有歸耕桑樂餌
且枝梧鄰曲相扶將豈無甕中酒老病不能觴南山有
歸處歲晚柏已行下從吾親游此事歲月長

又

無食苦日長無衣念秋近雖云老農圃未害樂堯舜士
生要弘毅病在墮驕吝得喪纔幾何衰哉以身徇平生
最耐事霜雪亦滿鬢憂患一洗空吾道其少進

幽居

幽居人迹稀柴扉晝常掩小池清見底疎雨時數點蟬
嘯秋未衰花房暮先斂老大固多傷年華還冉冉

山居食每不肉戲作

谿友留魚不忍烹直將蔬糲送餘生二升盞粟香炊飯
一把畦菰淡煮羹莫笑開單成淨供也能捫腹作徐行
秋來更有堪誇處日傍東籬拾落英

自笑

諸公衮衮幾金貂自笑無材負聖朝老氣醉中猶跌宕

閒身夢裏亦逍遙
舊書日伴吾兒讀
薄飯時從野叟招
病後秋衣須早製
竹窗殘夜雨蕭蕭

世上

世上悠悠東逝波
金丹將奈鬢絲何
牆頭楊柳知秋早
窗外芭蕉受雨多
伏檻自應如老驥
還鄉元欲借明駝
吾碁一局千年事
從使旁觀爛斧柯

夜歸偶懷故人獨孤景略

買醉村場半夜歸
西山落月照柴扉
劉琨死後無奇士

獨聽荒雞淚滿衣

秋夜自近村歸

江頭浩歌天宇寬
刺船歸來清夜闌
女貞林黑月未上
姑惡聲悲村已寒
不恨故交日零落
本知浮生難控搏
頭童面槁更安往
莫問傷人君自看

夜聞蟋蟀

布穀布穀解勸耕
蟋蟀蟋蟀能促織
州符縣帖無已時
勸農促織知何益
安得生世當成周
一家百畝長無愁

綠霜鬱鬱暗微徑黃犢叱叱行平疇荆扉績火明煜煜
黍隴饁飯香浮浮耕亦不須勸織亦不須促機上有餘
布盜中有餘粟老翁白首如小兒鼓腹擊壤相從嬉

秋夜風雨暴至

風聲掠野來頡洞如翻濤雨聲集庭木桐葉聲最豪殘
暑一洗空凜然念綈袍秋穀已登場欲忘終歲勞東舍
捉鵝鴨西舍烹豚羔籬落開寒花房櫳壓小槽貧賤何
所歡樂歲成吾高却拾牆角檠拂拭賀汝遭

月下小酌

草樹已秋聲
郊原喜晚晴
風生雲散盡
天濶月徐行
下箸槎頭美
傳盃甕面清
追歡猶可勉
徂歲不須驚

鄰曲有未飯
被追入郭者
憫然有作

春得香秔摘
綠葵縣符急急不容炊
君王日御金華殿
誰誦周家七月詩

吾廬

吾廬鏡湖上
傍水開雲扃
秋淺葉未丹
日落山更青
孤

鶴從西來長鳴掠沙汀亦知常苦饑未忍吞羶腥我食
雖不肉七箸窮芳馨幽窗燈火冷濁酒倒殘瓶

飲酒望西山戲詠

太白十詩九言酒醉翁無詩不說山若耶老農識幾字
也與二事日相關

小院

小院回廊夕照明放翁夜坐一筇橫銅匱暖徹香初過
鐵杵聲清藥欲成世事熟看無一可古人不作與誰評

新涼社酒家家熟，使用佯狂了此生。

發篋得故人書有感

衰鬢星星換舊青，世間萬事但堪驚。
晨炊欲熟客未覺，夜漏漸殘人尚行。
花發且為無事飲，詩成非復不平鳴。
京華朋舊凋零盡，忽見緘題似隔生。

秋光

年年最愛秋光好，病起逢秋合賦詩。
叢菊漸黃人醉後，孤燈初暗雨來時。
舊書細讀猶多味，老態相尋似有期。

早信為農勝覓祿一生虛作虎頭癡

晚秋風雨

儘道漁村陋秋來物色奇寒生沽酒興雨及種花時狂
舞欲誰屬清吟空自知茫茫宇宙內吾道竟何之

幽居

白髮蕭蕭僅到肩一枝藤杖日翩跹草苔牆北棲雞屋
泥補橋西放鴨船心似枯葵空向日身如病櫟孰知年
放懷却有翛然處不養金丹不學禪

又

面面秋山擁翠屏
天留三畝著雲扃
迎霜南阜楓林赤
飽雨西村菜甲青
散策人驚衰後健
浩歌自覺醉中醒
凌煙冠劍應無爾
布帽羣襦老管寧

故山

功名莫苦怨天慳
一櫂歸來到死閒
傷水無家無好竹
卷簾是處是青山
滿籃箭出瑤簪白
壓擔稜梅鶴頂殷
野興盡時尤可樂
小江煙雨趁潮還

鏡湖

又

禹祠行樂盛年年繡轂爭先輦畫船十里煙波明月夜
萬人歌吹早鸞天花如上苑常成市酒似新豐不直錢
老子未須悲白髮黃公壚下且閒眠

禹祠

又

老尉鴻飛隱市門千年猶有舊巢痕陸生於此寓棋局

予二十年
前嘗寓居

曾文時來開酒樽

曾文謂
文清公

渺渺帆檣遙見海

冥冥蒲葦不知村數僧也復投詩社零落今無一二存

梅山

又

落磧泉奔舞玉虹，護丹松老卧蒼龍。
霜柑籬角寒初熟，野碓雲邊夜自舂。
挈人沽村市酒，打包僧起寺樓鐘。
幽尋自是年來嬾，枉道山靈不見容。

雲門

秋晚弊廬小葺一室，過冬欣然有作。

放翁畢竟合躬耕，剡喜東歸樂太平。
碧瓦新霜寒尚薄，明窗嫩日雨初晴。
素琴尋得無絃曲，野餉烹成不糝羹。

更說市朝癡太絕一湖秋水濯塵纓

小室晚酌

病不禁寒怯早霜東齋隨事具
盃觴清時寬大何妨醉
白首龍鍾未減狂枝葉扶檠
山果熟鹽醃調適野蔬香
興闌徑覓華胥路枕籍圖書滿一床

冬晚山房書事

山澤何妨老太平巉巖骨相本來清
月明滿地看梅影
露下隔溪聞鶴聲未辨藥苗逢客問
欲酬琴價約僧評

胡奴仁祖今俱絕且學湘纍拾菊英

又

屏迹山村病日增烏皮几穩得閒凭凍雲倚水封梅萼
嫩日烘窗釋硯冰歲盡光陰饒衮衮身閒醉夢且騰騰
蠻童采藥歸來晚客至從春喚不應

村居日飲酒對梅花醉則擁紙衾熟睡甚自適也
江村歲晚掩柴荆地僻久無車馬聲孤寂惟尋麴道士
一寒仍賴楮先生醅頭珠滴愁先破帳底春回夢易成

莫笑衰翁殺風景小瓶梅藥解卿卿

山居疊韻

禽吟陰森林鹿伏樸檟木嗚呼吾徒愚僕僕逐肉粟聯
翩憐鳶肩覆餗速戮辱艱難還山間獨欲足畜牧躋梯
棲西谿築屋宿北谷光芒常當藏櫝玉觸俗目

寓歎

心已忘斯世天猶活此翁嫩湯茶乳白軟火地爐紅課
婢耘蔬甲呼兒下釣筒生涯君勿笑聊足慰塗窮

又

久矣門無客高齋獨掩扉敢言消壯志要是息危機清
露夜自滴孤雲寒不歸晨炊勿闕念更典篋中衣

又

裘薄便冬暝簟空畏午飢臨成乞米帖看入借車詩學
古心猶壯憂時語自悲公卿闕自重社稷欲誰期

劔南詩豪卷二十一

謹案卷二十一第十七頁後一行青山隨處有三
窟刊本三訛山今改

欽定四庫全書

總校官庶吉士臣張能照

校對官編修臣周厚輅

校對官庶吉士臣羅修源

謄錄監生臣程學道

謄錄監生臣吳鐫

欽定四庫全書薈要

集部

劔南詩藁卷二十三



詳校官助教臣謝登雋

欽定四庫全書薈要卷一萬五千五百十二

集部

劔南詩藁卷二十二

宋 陸游 撰

贈惟了侍者

水邊剝啄打門誰滿袖清風一紙詩驚起放翁蝴蝶夢
半窗寒日欲斜時

又

雪中僵卧不須悲徹骨清寒始解詩一等人間閒草木

月窗君看早梅枝

題湖邊旗亭

春色初回杜若洲佳人又典鸛鷀裘八千里外狂漁父
五百年前舊酒樓渡口遠山顰翠黛天邊新月挂瓊鉤
回頭笑向紅塵說也有閒愁到此不

醉卧道邊覺而有賦

太華五千仞天台四萬丈一枝古藤如黑龍天遣飄然
寄閒放莫怪公卿不我知我自不知渠是誰史書弄筆

後來事繡鞍寶帶聊兒戲旗亭爛醉官道卧醒後無人
數吾過世間恩怨一時空且免他年送臨賀

寓懷

脫粟未為飢短褐未為寒衆毀心自可身困氣愈完茆
屋雖三間趺坐則已寬濁酒不滿瓢浩歌有餘歡祿食
妻子樂功名後人看成敗兩蝸角貴賤一鼠肝芒芒百
年夢底物堪控搏不如學餐霞駐此雙頰丹行披終南
雲飛渡黃河湍歸然過空城人言古長安霜露蒙荆榛

喟然增永歎

又

蒼壁與黃琮初非俗所貴粲然薦縑藉可對越天地我
豈賣餅兒自銜三家市持槃叫道邊雖售無乃媿文章
等卜祝王公以儒戲書成藏名山此是千載事

又

我昔浮滄溟浩渺難具論華夷漭不辨日月互吐吞神
龍忽上騰尾鬣風霆犇積浪自生火烈焰焚乾坤笑謂

同舟子世豈無鵬鯤聊持豪逸氣壓汝破碎魂

又

鮑魚載沙丘鹿馬獻阿房泗上老亭長仿佯起東方干
戈暗寓縣黥徒化侯王富貴誠可慕菹醢亦足當青門
獨無恙種瓜亦何傷後有阮嗣宗絕識未易量楚漢真
豎子孰謂斯人狂

喜事

武夷老子雪垂肩喜事何曾減少年鸚鵡螺深翻細浪

辟邪爐暖起微煙幽花滴露霑紗帽亂絮憑風撲畫船
虎豹九關君勿歎未妨一笑住壺天

甜羹

松蘆服山藥芋作羹

山厨薪桂軟炊秔旋洗香蔬手自烹從此八珍俱避舍
天蘇陀味屬甜羹

縱筆

文叔一人知此翁洛陽城裏又春風讓他綠髮好年少
二十四歲作三公

又

一紙除書到海邊
紫皇賜號武夷仙
功名敢道渾無意
暫作閒人五百年

又

背上嵯峨兩肉山
明馳有債自須還
玉霄峰頭雪色鹿
清曉一聲烟雨間

又

素月徘徊牛斗間
天風吹鶴度函關
一年似此佳時少

喚起陳搏醉華山

自嘲解嘲

世變真難料吾癡只自嘲移山謀畚土黏日欲煎膠得
句題修竹烹茶拾墮巢行年不須算斷是死衡茆

又

種稻稽山下誅茆剡曲傷鳴雞耐昏旦飛燕異炎涼古
劍寒三尺殘書亂一床穹穹與厚厚能識我非狂

春雨絕句

恰喜西窗晚照明
虛簷又報雨來聲
端憂不用占龜兆
壞盡花時自解晴

又

千點猩紅蜀海棠
誰憐雨裏作啼粧
殺風景處君知否
正伴鄰翁救麥忙

又

天公似欲敗蚕麤
雨冒南山暮不收
駭女癡兒那念此
貧看科斗滿清溝

又

今年春半不知春
飛電奔雷嚇殺人
縫得春衫元未著
免教惆悵洛陽塵

又

梅中最晚是緗梅
一日來看欲百回
俗紫凡紅終避舍
不妨自向雨中開

又

蕭條冬令侵春晚
淅瀝寒聲滴夜長
更事老翁頑到底

每言宜睡好燒香

雨中卧病有感

病卧窮山白髮新不堪風雨過中春
歌呼空倚一尊酒零落漸無吾輩人
千載詩書成長物兩京宮闕委邊塵
非熊老子不復見誰弔遺魂清渭濱

舟中作

不遷比景成交河三徑歸來得已多
應俗愈疎身老大讀書漸廢意蹉跎
閒從孫叟蘇門嘯醉和荆卿易水歌

歌罷却揮孤櫂去石闌干下買漁蓑

石闌干在
剡谿道中

山園

買得新園近釣磯旋營茆棟設柴扉山經宿雨修容出
花倚和風作態飛世事只成驚老眼酒徒頻約典春衣
狂吟爛醉君無笑十丈愁城要解圍

聞北亂

運數羣兇盡煙塵北道昏百年身易老萬里志空存楊
柳搖馳道櫻桃奉寢園南公忠義薄此恨與誰論

題千秋觀懷賀亭

河湟使典珥左貂曲江相君謝不朝宮中玉環狐作妖
黠奚旁窺心已驕天維欲絕地軸搖有識凜凜憂宗祧
賀公託言師松喬黃冠徑歸侶漁樵老馬立仗不自聊
去如鸞鳳冲煙霄傾都祖餞擁渭橋賢哉大夫脫塵囂
揚州渡江木蘭橈入東夜聽錢塘潮我來故祠竹蕭蕭
黃冠野服傳生綃詞卑媿匪英瓊瑤空采蘋藻奠桂椒
虛堂斷香閉寂寥遺魂零落何由招

禹祠

我昔下三峽南賓繫歸驢渡江謁神禹拜手薦俎壺壽
藤枝如虬巨柏腹若剗門庭雖日荒殿寢猶枝梧巴俗
喜禱祠解牛舞羣巫巍巍黻冕古食與山鬼俱聖度固
無容臣憤獨不攄還鄉瞻廟貌羸政久已除嶽牧儼如
生想像間都俞廓清雖可喜欲退復躊躇念昔平水土
綦布畫九區豈知千歲後劉石居中都邊將失大刑今
復誰前驅直令挽天河未濯戰血汙山鬼細事耳披攘

直須更天下讐不復大恥何時祛
蚩蚩謂固然此責在
吾徒揮涕灑庭草誰憐小臣愚

樊江

手中一卷養魚經又向樊江上
草亭朝雨染成新漲綠
春烟澹盡遠山青榜舟不厭頻
來往岸幘常須半醉醒
賦罷新詩自高詠滿汀鷗鷺欲忘形

東關

路入東關物象奇角巾老子曳筇枝
蠶如黑蟻桑生後

秧似青鍼水滿時
穿市不嫌微雨溼
過谿翻喜壞橋危
當年野店題詩處
又典春衣具午炊

又

雲蹙魚鱗襯夕陽
放翁繫纜水雲鄉
一筇疾步人驚健
斗酒高歌自笑狂
風暝市樓吹絮
雪蠶生村舍采桑黃
東阡南陌無窮樂
底事隨人作許忙

練塘

微風吹頰酒初醒
落日舟橫杜若汀
水秀山明何所似

玉人臨鏡暈螺青

娥江市

小聚依江近支流入浦分
荒寒孤店雨零亂野祠雲薄
餉炊畚粟珍烹采澗芹
年來去健美摩腹自欣欣

宿野人家

避雨來投白版扉
野人憐客不相違
林喧鳥雀棲初定
村近牛羊暮自歸
土釜煖湯先濯足
豆豔吹火旋烘衣
老來世路渾諳盡
露宿風餐未覺非

舟中遣懷

三黜歸來結草廬平生狂態掃無餘但思下帷授老子
那復騎牛讀漢書歷歷舊遊渾似夢蕭蕭殘髮不勝梳
閒中事業君知否不把漁竿即荷鉏

歸次樊江

芳草東西路綠楊長短亭人生豈匏繫吾志本鴻冥征
袖朝霑雨歸帆夜帶星長魚幸能買且復倒殘瓶

夜過魯墟

中夜過魯墟船底鳴細浪月出菱歌長林閭績火壯故
居不可識四顧但青嶂百年幾廢興撫事一悽愴士生
本耕稼時來偶卿相功名亦餘事所勉在素尚况吾多
難者久已冥得喪微祿行當辭沒身事幽曠

有感

溫洛滎河拱舊京從來人物富豪英報仇雖有楚三戶
守節得無齊二城北寇寧能斷地脉王師行復暢天聲
鳳麟久伏應爭奮勉為明時頌太平

遊石帆玉笥石旗諸山

暮景苦多病幽尋寄一欣
溪喧常似雨石潤易生雲
天迥回鴉陣林疎過鹿羣
莫談朝市事吾老厭紛紛

信步近村

端閒何以永今朝拈得筇
枝度野橋三畝空園喧啄
木十尋高樹絡凌霄長飢
未必緣詩瘦多悶惟須賴
酒澆興盡歸來又陳迹一
林風葉暮蕭蕭

寒食省九里大墓

陌上簫聲正賣錫籃輿兀兀雨冥冥人來平野一點白
山壓亂雲千疊青石馬朱門松下路凍壑冷飯柳陰亭
華顛尚記兒童日撫事興懷涕自零

平水道中

處處陂水滿家家巢燕忙葉舒桑漸闇穗重麥初昂高
下山花發青紅粉餌香亦知時節好老大自悲傷

五雲橋

往時鏡湖波防不廢則若耶溪水常滿可
行大舟至雲門北橋本跨溪上今乃在平

陸
矣

若耶北與鏡湖通
縹緲飛橋跨半空
陵谷變遷誰復識
我來徙倚暮煙中

小雨雲門溪上

好雨疎疎壓暮埃
斷雲漠漠帶春雷
離黃穿樹語斷續
翠碧銜魚飛去來
生菜入盤隨冷麤
朱櫻上市伴青梅
狂吟不是誇強健
老氣如山未許摧

雲門獨坐

山北山南處處行
回頭六十七清明
如今老去摧頽甚

獨坐焚香聽水聲

泛湖至東涇

涇作鏡

春水六七里夕陽三四家
兒童牧鵝鴨婦女治桑麻
地僻衣巾古年豐笑語譁
老夫維小艇半醉摘藤花

又

湖光分別浦嶺路過前村
泉石相縈帶雲烟互吐吞
耕犁無易業鄰曲有通婚
試覓誅茆地吾將遺子孫

又

細細桃枝竹疎疎麕眼籬雪霜燒葑夜月露采菱時腰
斧登山早移簷出浦遲關心盡幽事恨汝不能詩

舟過梅塢胡氏居愛其幽邃為賦一詩

稽山翠入家家窗此家清絕無與雙丹葩綠樹錦繡谷
清波白石玻璃江一堤茂草有眠犢數掩短籬無吠犬
北軒商略可散髮借與放翁傾酒缸

北窗

北窗本意傲羲皇老返園廬味更長犢健戴星耕白水

蠶飢衝雨采青桑，
俚儒朱墨開冬學。
廟史牲牢祝歲穰，
從此鬢毛雖似雪，
未妨擊壤頌虞唐。

聞蛙

科斗忽安在，蛙聲豪有餘。
雖成兩部樂，恨失一編書。
忿怒緣何事，號呼可奈渠。
厨人不遐棄，猶得伴溪魚。

晚春感事

風惡房櫳燕子歸，
雨多山路蕨芽肥。
青簪旋擣作寒食，
白葛預裁充暑衣。
穉子日長供課早，
故人官達寄書稀。

幽居自喜渾無事又向湖陰坐釣磯

又

和風薄靄過清明減盡重裘覺體輕正午軒窗無樹影

乍晴阡陌有鶯聲釀成西蜀鵝雛酒

鵝黃廣漢酒名

煮就東坡

玉糝羹捫腹脩然出門去春郊何處不堪行

又

徙倚闌干送落暉年華冉冉恨依依護雛燕子常更出
著雨楊花又嬾飛已為讀書悲眼力還因攬帶歎腰圍

親朋半作荒郊冢欲話初心淚滿衣

又

少年騎馬入咸陽鶻似身輕蝶似狂蹴鞠場邊萬人看
鞦韆旗下一春忙風光流轉渾如昨志氣低摧只自傷
日永東齋淡無事閉門埽地獨焚香

山居

平生杜宇最相知遺我巢山一段奇茶磴細香供隱几
松風幽韻入哦詩溪邊拂石同兒釣竹下開軒喚客碁

幾許放翁新事業不教虛過太平時

四月三日同子坦子聿遊湖中諸山

我行無所詣悠賜信舴艋愛此綠樹村捨棹度小嶺路
窮忽披豁恍然得異境蒼玉立萬峯清鏡渺千頃更為
西南行聊破春晝永遙看秀遠處疑足事幽屏一崦果
可人竒石插碧井鏘鳴若環珮其味復甘冷徘徊不忍
去照我鬚鬢影須臾日穿林井面光炯炯古今勝絕意
正用一笑領安得絕世喧於茲慕箕顓

梅僊塢小隱

綠樹陰陰小嶺西
一翁二子自扶攜
雨前芳嫩初浮盃
臘脚清醇旋拆泥
本欲省緣行買餅
未能去殺尚烹雞
二者皆紀
是日實事弄撓莫便尋歸路
湖靜無風日未低

盟雲

謂雲本無心
企望乃爾奇
謂雲果有心
百變端為誰
豈憐此翁愁
一出怡悅之
橫截千嶂平
高擎一峯危
銀城突差我
玉海浩渺彌
或為羣龍矯
或作孤鶴飛
卷舒閒

有態去來倏無時
滃滃覆松頂靄靄映水湄
帶雨過僧窗和月倚釣磯
豈惟困畫工吾詩固難追
惟當與之盟畢世相娛嬉
忍飢固易耳此友不可欺

示兒

舍東已種百本桑
舍西仍築百步塘
早茶采盡晚茶出
小麥方秀大麥黃
老夫一飽手捫腹
不復舉首號蒼蒼
讀書習氣埽未盡
燈前簡牘紛朱黃
吾兒從有論治亂
每使老子喜欲狂
不須飲酒徑自醉
取書相和聲琅琅

人生百病有已時，獨有書癖不可醫。
願兒力耕足衣食，讀書萬卷真何益。

村居初夏

暮境難禁日月催，臘醅初見拆泥開。
壓車麥穗黃雲卷，食葉蠶聲白雨來。
薄飯蕨薇端可飽，短衫紵葛亦新裁。
宦塗自古多憂畏，白首為農信樂哉。

又

北陌東阡節物新，往來饋餉走比鄰。
出籠鵝白輕紅掌，

藉藻魚鮮淡墨鱗笑語相聞豐歲樂耕桑自足古風淳
頽然一醉茆簷下且免西曹議吐茵

又

煮酒開時日正長山家隨分當年光梅青巧配吳鹽白
筍美偏宜蜀豉香風暝緊催蠶上簇雨餘閒看稻移秧
老夫見事真成晚浪走人間兩鬢霜

又

天遣為農老故鄉山園三畝鏡湖傍嫩莎經雨如秧綠

小蝶穿花似繭黃斗酒隻雞人笑樂十風五雨歲豐穰
相逢但喜桑麻長欲話窮通已兩忘

又

故鄉風物勝荆吳流水青山無處無列植園林多美果
飽鉏畦壠富嘉蔬橋邊來淬剝桑斧池畔行芟縛撥菰
我有素紈如月扇會憑名手作新圖

城東逆旅

店家乞火燎征衣溼竹生薪不受吹更甚從戎戍邊日

正如隨計入關時百年擾擾夢相似萬事悠悠心自知
賴有牀頭周易在不妨清坐忍朝飢

江村初夏

紫葢狼籍桑林下石榴一枝紅可把江村夏淺暑猶薄
農事方興人滿野連雲麥熟新食楚小裏荷香初賣鮓
蘋洲蓬艇疾如鳥沙路芒屨健如馬君看早朝塵撲面
豈勝春耕泥沒踝為農世世樂有餘寄語兒曹勿輕捨

舟中作

湖海飄然避世紛
汀鷗沙鷺舊知聞
漁舟卧看山方好
野店沽嘗酒易醺
病骨未成松下土
老身常伴渡頭雲
美芹欲獻雖堪笑
此意區區亦愛君

東關

天華寺西艇子橫
白蘋風細浪紋平
移家只欲東關住
夜夜湖中看月生

又

煙水蒼茫西復東
扁舟又繫柳陰中
三更酒醒殘燈在

卧聽蕭蕭雨打篷

少微山

平生一舸艣幾到少微山
傑觀埽無迹高人呼不還
岨崩危欲壓磴斷滑難攀
日暮增幽興漁歌泝蒼間

舟行至織女潭

艣枝搖碎碧琉璃
織女潭東白塢西
帶犢吳牛依茂樾
添巢海燕啄新泥
山谿曲折遙通谷
沙水淙潺各赴溪
猶恨兒曹不同載
一尊他日要重攜

書歎

獲落非時用棲遲送此生只知求醉死何憚得狂名伏
櫪天涯老吞舟海濫橫眼前舊交盡有淚對誰傾

小園獨立

草香無處覓花嫩不禁飛澤國春歸晚柴門客過稀新
泥添燕戶細雨溼鴛衣倚杖臨階久衰翁氣力微

觀蘇滄浪草書絹圖歌

天孫獨處河之湄龍梭夜織冰蠶絲機頭剪落光陸離

鯨鯨仙人醉題詩字大如斗健欲飛利刃猛斫生蛟螭
墨渴字燥尤怪奇百鬼潛影神靈悲嗚呼東雲作筆兮
海為硯激水上騰龍野戰乾坤震蕩人始驚筆未落時
誰得見

睡起書觸目

壓架藤花重團枝杏子稠渴蜂窺硯水弱燕集簾鉤入
夏暑猶薄投閒身自由午窗初睡起幽興付茶甌

曉雨初霽

曉來一雨洗塵痕濃綠陰陰可一園燕子聲中寂無事
獨穿苔徑出籬門

夏雨

連朝暑溽不可過動地忽有東北風嵯峨雲壓世界碎
天矯龍卷江湖空塵沙洗濯草木醒溝澮瀲灩舟舸通
更煩造物出壯觀跨海千丈垂天虹

自東涇度小嶺間有地可卜菴喜而有賦

小嶺西南煙水間頗聞有地百弓寬誰其云者兩黃鵠

何以報之雙玉盤竹塢未昏先掩暖蓮汀當暑亦清寒
一菴何日從吾好會約高人共倚闌

露坐

五月暑猶薄中庭試葛衣蛙聲經雨壯螢點避風稀塵
念三生誤歸心半世違殘年端有幾可復負漁磯

自笑

自笑胸中抵海寬韭蘆麥飯日加餐住山緣熟塵機息
養氣功深槁面丹惡路慣曾經灩澦浮生何啻夢邯鄲

鏡湖五月秋蕭爽剝傷灘頭把釣竿

夜賦

夜窗搔首髮鬢髻病不勝衣倚瘦藤堪笑顏回忍饑面
常依韓愈看書燈殘生已與灰俱冷舊友誰如几可憑
月落風生忽增氣掠簷勁翮有歸鷹

書懷

老死已無日功名猶自期清笳太行路何日出王師

醉後作小草因成長句

天教老去未全衰猶欠縱橫萬首詩家近將軍觴詠地
身如太史滯畱時酒翻銀浪紅螺醖墨涌玄雲紫玉池
流落不妨風味在花前醉草寫烏絲

雨中作

空濛初喜灑欄楹忽聽空階點滴聲高枕便知宜夕睡
豐年不歎負春耕多情幽草沿牆綠無賴羣蛙繞舍鳴
屈指清秋兩旬近却愁徂歲又崢嶸

詠史

入郢功成賜屬鏤削吳計用載厨車閉門種菜英雄事
莫笑裒翁日荷鉏

登鵝鼻山至絕頂訪秦刻石且北望大海山路危
甚人迹所罕至也

街頭旋買雙芒屨作意登山殊不惡蒼崖無罅竹鞭逸
崩石欲墜松根絡憑高開豁快送目歷險崎嶇危著脚
川雲忽起兩蛟舞瀑水高吹萬珠落大巖空腔誰所剜
絕壁峭立端疑削坡平或可坐百人峽束僅容飛一鶴

蛇蹊岌岌頭自眩鬼谷慘慘神先愕秦皇馬迹散莓苔
如鑄非鑄鑿非鑿殘碑不禁野火燎造物似報焚書虐
人民城郭俱已非煙海浮天獨如昨

六七月之交山中涼甚

城市方炎熱村墟乃爾涼拂窗桐葉下繞舍稻花香獨
鶴警秋露雙螢明屋梁卧聞機婦織感歎夜初長

幽居

大患元因有此身百年強半走跋跋折殘廣武城邊柳

染盡洛陽衣上塵繞樹鵲孤棲漸穩支床龜老息初勻
出門不欲摩雙眼世態年來又一新

又

百頃菰蒲古澤中老夫病起恰秋風流年不貸人皆老
造物無私我自窮市隱昔曾從嘯父山栖今欲效園公
芳樽雖匪金丹術槁面尊前也顰紅

又

煙水重重際海涯夜深風雨耿茆茨交朋散落歡娛少

憂患侵陵志氣衰癡腹何由有鱗甲俗情自未去毛皮
詩書六十餘年夢更擬傳衣付小兒

園中雜咏

藝花本無多過眼那復遺陰陰一園綠佳處乃在茲悠
然東窗下顧與枕簟宜風輕竹解籜雨足果壓枝

又

珍禽下上鳴迨及清潤時豈惟侑我觴亦以起我詩白
練一團雪來與紅練俱魚虎無照水意若愛翠裾

予所居南竝鏡湖北則陂澤重複抵海小舟縱所
之或日夕乃歸

滑笏鏡湖波延緣入海路晨曦射油窗迴帆天已暮人
間五十年自笑晚乃悟歸來寫苔紙老億無傑句

王給事餉玉友

散髮蕭然蒲葦林馬軍送酒慰孤斟江河不洗古今恨
天地能知忠義心無侶有時邀落月放狂連夕到橫參
玉船湛湛真秋露却恨鵝兒色尚深

晚興

白布帚襦退士裝
短籬幽徑獨相羊
莎根蟋蟀催秋候
稗穗蜻蜓立晚涼
屈子所悲人盡醉
酈生常謂我非狂
知心賴有青天在
又炷中庭一夕香

村圃

村圃穿荒翳
秋容變慘悽
柳疎蟬噪急
雨重鵲飛低
小草臨池學新詩
滿竹題若令車馬到
何處有幽棲

劔南詩藁卷二十二

欽定四庫全書薈要卷一萬五千五百十三

集部

劔南詩藁卷二十三

宋 陸游 撰

七月一日夜坐舍北水涯戲作

兀傲胡床酒半醒
釣筒收盡數舟橫
風生細葛無三伏
月上疎林正四更
北斗離離低欲盡
明河脉脉去無聲
斥僊豈復塵中戀
便擬騎鯨返玉京

病後登山亭

野客雙蓬鬢空山一草亭睡魔欺茗薄疾豎怯丹靈治
世窮馮衍殘年老管寧安居得後死不敢恨飄零

覽鏡

白頭漸覺黑絲多造物將如此老何三萬里天供醉眼
二千年事入悲歌劒關曾蹴連雲棧海道新窺浴日波
未頌中興吾未死插江崖石竟須磨

比自三江杭
海至大亭

遣懷

許國區區不自勝秋風空羨下鞦鷹青雲夜歎初心誤

白髮朝看一倍增，積憤有時歌易水。孤忠無路哭昭陵。

唐制有寃者頭顱自揣，今如此尚欲閒尋紫閣僧。
陳希夷奇

錢宣靖復招紫閣僧相之

開元寺小閣十四韻

淵源兩名衲，築閣捫星辰。近山卧蜿蜒，遠山高嶙峋。朝看雨空濛，暮揖雲輪囷。賦詩有宿諾，下語終未親。萬法不孤起，請君作其因。高掛四面窗，淨掃一榻塵。室中絕人聲，門前謝車輪。容我睡半日，兩忘主與賓。緩燒海南

沈細碾建谿春是間儻有句可與屈宋鄰詩如奮螭龍
天矯不受馴使可造次得何異池中鱗世有擾龍手媿
我非其人詩不已就乎著眼勿逡巡

寄題趙寬之主簿慈順堂

人間得意盡危機獨有榮親事未非魏闕恩光新綠綬
高堂娛侍舊斑衣牙籤插架書無恙蘭膳循垓養莫違
况有兩公天下士為君百斛瀉珠璣

謝昌國中丞楊廷秀祕監皆嘗有此

作

郊居

平生萬事不容求，惟有郊居志已酬。
更漏遠城雞唱曉，歲時無歷葉知秋。
潮生小舫行收荻，月落長歌起飯牛。
已作幸民仍醉死，人間毀譽判悠悠。

又

索米官倉例坐愚，東方未可戲侏儒。
行藏要付他年看，富貴真堪一笑無。
等死不過賒歲月，長閒勿更問妻孥。
狂豪儘道非平昔，老膽輪囷尚滿軀。

新秋感事

江上清秋昨夜回
漁扉正對荻洲開
志存天下食不足
節慕古人讒愈來
風際紙鸢那解久
祭餘芻狗會堪哀
蕭然散髮聽秋雨
剝領新涼入酒盃

又

北渚秋風凋白蘋
流年冉冉默傷神
強顏未忍乞蟠祭
積毀僅逃輸鬼薪
半榼浮蛆初試釀
兩螯斫雪又嘗新
受恩自度終無報
聊為清時備隱淪

八月一日微雨驟涼

流汗沾衣喘不供孰知有此快哉風
新涼忽覺從天下
殘暑真成埽地空
恰轉輕雷過林塢
已吹好雨到簾櫳
幽人病愈閒無事
剡賦歌詩樂歲豐

秋雨

剡曲高秋一草亭
雨來迨我醉初醒
豪吞平野宜閒望
急打虛窗入靜聽
沙上溼雲號斷雁
籬根衰草綴孤螢
老人嬾復親燈火
卧看爐香掩素屏

又

赤日黃塵勢已窮

七月中旬後
秋暑尤劇

淒風苦雨却忽忽盛衰

默定見天造寒暑密移成歲功
柯葉凋零無茂木羽翰
顛顛有羈鴻誰知病客悲秋意盡在空堦點滴中

又

冷雨蕭蕭澀不晴
敲簷遮盡小窗明
故衾獨展成酣寢
新釀初嘗得細傾
壁間積陰添蠹字
床琴生潤咽弦聲
此時懷抱真難遣
一首清詩信筆成

月下獨坐

髮根蕭爽受微風，徙倚闌干月正中。
天宇了無雲一點，城樓俄報鼓三通。
庭臯簌簌吹凋葉，江渚翩翩落斷鴻。
回首人間塵土惡，騎鯨聊駐水精宮。

秋日步至湖桑埭西

伏枕哀方劇，搢筇氣忽增。
細泉鳴暗竇，疎樹映孤燈。
斷雁寒依渚，強魚健脫罾。
曾行纏已無用，却作在家僧。

秋社

明朝逢社日鄰曲樂年豐稻蟹雨中盡海氛秋後空不
須諛土偶正可倚天公酒滿銀盃綠相呼一笑中

又

浦溆漁歌遠茆茨績火明新涼迎病起樂事及秋成社
肉分初至官壺買旋傾殘年得家食何以報時清

秋思

南鄭歸來二十霜背人歲月去堂堂破裘不補知寒早
倦枕無憀厭夜長年少若為評宿士狂生曾是說高皇

慨然此夕江湖夢猶繞天山古戰場

又

一生書劍徧天涯兩歲秋風喜在家爛醉日傾無算酒
高眠時聽屬私蛙園林夕照明丹柿籬落初寒蔓碧花
便擬掛冠君會否耳根不復耐喧譁

又

殘暑偏能著此翁吹襟刺喜得西風露滋小徑蘭若冷
月射高梁燕戶空衰病呻吟真一洗醉歌跌宕與誰同

從今日日增幽興水際先丹數葉楓

又

半年閉戶廢登臨直自春殘病至今
帳外昏燈伴孤夢
簷前寒雨滴愁心中原形勝關河在
列聖憂勤德澤深
遙想遺民垂泣處大梁城闕又秋砧

又

雁陣橫空送早寒白頭病叟住江干
風林脫葉山容瘦
霜稻登場野色寬萬里關河驚契濶
一尊鄰曲話悲歡

書生餓死尋常事那得重彈掛壁冠

又

藥畦蔬壠夕陽中帶落冠欹一病翁步蹇每妨行樂興
眼昏幾廢讀書功露濃乍警雲巢鶴風勁先凋玉井桐
欲賦悲秋却休去鬢絲已是滿青銅

以事至城南書觸目

十里西風吹帽席江城衣杵遠猶聞路如劒閣逢秋雨
山似爐峰鏤算雲原上老翁眠犢背籬根小婦牧羊羣

百錢且就村場醉
舌本醇醪莫苦分

舍西夕望

茆舍菱陂北
柴門藥圃西
奇雲去人近
澹月傷簷低
野迥羊牛下
林昏鳥雀栖
郊墟少還往
父子自扶攜

題城侍者峴山圖

漢水沈碑安在哉
千年峴首獨崔嵬
平生不作羊公計
但欲無名死草萊

題城侍者剡溪圖

暮境侵尋兩鬢絲湖邊自葺小茆茨從今步步俱回棹
不獨山陰興盡時

晚秋農家

老來萬事嬾不獨廢應酬門前即湖山亦復罕出遊吾
廬有真樂一榻眠高秋回看世上事得喪良悠悠

又

秋雨無時休令我雙鬢縞庭荒何由鉏木落不得埽遣
奴入城市寸步困泥潦孤首幸可烹芻豢置勿道

又

秦犬使警夜畜雞用司旦徹警盜所窺失旦固吾患豈
無糠粃費施報不可緩家居亦為政發我中夜歎

又

東鄰稻上場勞之以一壺西鄰女受聘賀之以一襦誠
知物寡薄且用交里閭努力畢農功租賦勿後輸

又

我年近七十與世長相忘筋力幸可勉扶衰業耕桑身

雜老農間何能避風霜夜半起飯牛北斗垂大荒

又

疏溝架畧約拾瓦疊浮屠既盡菰韭畦遂營瓜芋區鼓
香吳鹽白飽計已有餘捫腹笑自賀無羊敗吾蔬

又

苦寒牛亦耕甚雨雞亦鳴物物各有職怠心其敢萌我
老返農圃學業付後生語兒續膏油勿輟讀書聲

又

吾里賢長者蓋有萬石風少年以利遷但可哀其窮仁
義亦何常聖賢與人同我言不足取汝豈忘乃翁

湖上小閣

蒲萄初紫柿初紅小閣憑闌萬里風莫怪年來增酒量
此中能著太虛空

苦雨歎

九淵龍公出忘還瓦溝垂溜聲淙淙茫茫大澤北際海
歟歟平湖南浸山吾廬四望路俱斷蛙龜爭雄亂昏旦

漏床腐席夜失眠溼竈生薪朝不爨今年十分喜有秋
豈知青秧出禾頭老夫一飽復繆悠聽兒讀書寬百憂
遣懷

秋風策策冷吹衣謝病經年晝掩扉絕世本來希獨立
刺天不復計羣飛細思萬古名何用太息九原誰與歸
葬近要離非素意富春灘畔有苔磯

道石

吾家舊藏奇石甚富今無復存者獨道石一尚置几案間戲作

秋風嫋嫋雨斑斑身隱幽窗筆硯閒小試壺公縮地術

數峯閒對道州山

又

林慮靈壁俱尤物散落人間不復還
投老東歸風味在
春陵小岫伴身閒

又

誤因祿米棄尊鱸一落塵埃底事無
布韞青鞵雖興盡
此峰聊當卧遊圖

蘭亭

蘭亭絕境擅吾州病起身閒得縱遊曲水流觴千古勝
小山叢桂一年秋酒酣起舞風前袖興盡回撓月下舟
江左諸賢嗟未遠感今懷昔使人愁

小葺村居

昔我作屋時趣欲庇風雨茆茨寒自刈條枚細相拄庫
濕生虵蛭得煖森翅羽摧撓自棟梁朽敗連柱礎鄰父
為我言努力謀安處土堅瓦可陶步近木易取豈知七
十翁沈痼久未愈身世如浮漚家舍如逆旅一床居易

足十歲敢自許且當復其初浩歌卧環堵

書陶靖節桃源詩後

寄奴談笑取秦燕愚智皆知晉鼎遷獨為桃源人作傳
固應不仕義熙年

有叟

有叟鏡湖邊茆茨八九椽憑闌秋萬里閉戶醉經年身
外浮名小胸中浩氣全此生吾自判造物恐無權

不寐

老眼睡眠少林居烟雨昏百年歸老死萬事付乾坤
熠燿螢穿幔錚錚鐵過門欲明聞漉稻浩歎閔黎元

遙夜

遙夜凜高秋蕭條念褐裘煙江新雁下竹塢暗螢流
舊友嗟誰在初心恐不酬一尊桑落酒聊得洗吾愁

秋晚思梁益舊遊

幅巾筇杖立籬門秋意蕭條欲斷魂恰似嘉陵江上路
冷雲微雨溼黃昏

又

憶昔西行萬里餘長亭夜夜夢歸吳如今歷盡風波惡
飛棧連雲是坦途

又

滄波極目江鄉恨衰草連天塞路愁三十年間行萬里
不論南北怯登樓

紹興辛亥九月四日雨後白龍挂西北方復雨三日
作長句記之

長空黠闇如欲夜白龍驕拏見雲罅鱗間出火光照江
尾卷風霆雨如射老人百歲見未曾兒童閉門伏牀下
髮毛慘凜誰復支性命么微不禁嚇登場已歎禾生耳
出戶仍愁泥沒胯皇天生民豈不愛龍亦何心敗吾稼
父老相看出無策攬涕頓顙號粉社移牀避漏我亦忙
秉燭題詩寄悲叱

疏圃

疏圃依山脚漁扉竝水涯卧枝開野菊殘枿出秋荼病

骨知天色羈懷感物華餘年有幾許且灌邵平瓜

農家

南畝勤菑穫西成謹蓋藏種蕎稊霽日斫荻待微霜
碓新春白山厨野簌香何須北窗卧始得傲羲皇

自喜

半生羈宦走人間醉裏心寬夢裏閒自喜如今無一事
讀書纔倦即遊山

重九後風雨不止遂作小寒

病軀剗喜即新秋殘暑無端抵死留風雨埽除雖一快
週年搖落已堪愁

又

菊枝歆倒不成叢井上梧桐葉半空射虎南山無復夢
雨簑煙艇伴漁翁

又

夜長稚子添書課霜近衰翁憶醉鄉儘道吳中時節晚
菊花也有一枝黃

城南上原陳翁以賣花為業得錢悉供酒資又不
能獨飲逢人輒強與共醉辛亥九月十二日偶過
其門訪之敗屋一間妻子饑寒而此翁已大醉矣
殆隱者也為賦一詩

君不見會稽城南賣花翁以花為糧如蜜蜂朝賣一株
紫暮賣一枝紅屋破見青天盎中米常空賣花得錢送
酒家取酒盡時還賣花春春花開豈有極日日我醉終
無涯亦不知天子殿前宣白麻亦不知相公門前築堤

沙客來與語不能會但見醉髮覆面垂髣髴

甜羹之法以菰菜山藥芋菜菔雜為之不施醯醬
山庖珍烹也戲作一絕

老住湖邊一把茆時沽村酒具山殽年來傳得甜羹法
更為吳酸作解嘲

暮秋書事

暮秋風雨卷茆茨砧杵聲中過雁悲楓葉欲丹先慘澹
菊叢半倒不支持旗亭人熟容賒酒野寺僧閒得對茶

莫怪苦尋林下事，駭機滿地只心知。

早自偏門入城晚出南堰門以歸

早從偏門入，暮從南堰歸。鮑郎山前路，空翠浮煙霏。秋
令忽已深，病骨頻添衣。向來慕功名，常恐斯心違。乃今
知其難，崦嵫迫殘暉。伯鸞與幼安，尚友或庶幾。到家亦
既夕，青燈耿窗扉。且復取書讀，父子窮相依。

初寒

蚊蠅埽迹葉飛初，剝喜幽窗讀我書。牆角短檠真耐久，

手中團扇又成疏百年作夢行休去九月無衣亦晏如
獨恨故人消息斷寒江誰與倩雙魚

張季長自離吳門未得近書

小舟自紅橋之南過吉澤歸三山

霏霏寒雨數家村雞犬蕭然晝閉門他日路迷君勿恨
人間隨處有桃源

又

六月芙渠正盛時畫船長記醉題詩世間光景元無盡
霜落荷枯又一奇

得猫於近村以雪兒名之戲為作詩

似虎能緣木如駒不伏轅但知空鼠穴無意為魚飧薄
荷時時醉艷觥夜夜溫前生舊童子伴我老山村

晝睡

眼昏妨讀書不睡復何如擁被新寒裏伸腰午飯餘斷
香縈倦枕疎雨滴前除未竟華胥樂茶甌莫喚渠

戲詠閒適

暮秋風雨暗江津不下書堂已過旬鸚鵡籠寒晨自訴

狸奴羶煥夜相親典衣旋買脩琴料叩戶時聞請藥人
說與鄉鄰當賀我死前長作自由身

寓歎

荷戈常記壯遊時齒豁頭童不自知已分功名非力致
更悲文字與年衰端居漸覺從人嬾熟睡偏於聽雨宜
自斷歸休君勿怪一盃薺糝敵瓊糜

又

醉撫酒壺憐羶矮卧看香岫愛嶙峋舊時京洛塵埃面

今作江湖風月民幻世界中均起滅太虛空裏孰寃親
可齋入定論千劫說與天魔任惱人

獨夜

獨夜迢迢掩素屏病懷羈思共冷屏房櫳十月寒初重
風雨三更酒半醒繁杵有聲時斷續殘缸無焰尚青熒
恍然喚起西征夢身卧金牛古驛亭

記九月二十六夜夢

海山萬峯鬱參差宮殿插水蟠蛟螭碧桃千樹自開落

飛橋架空來者誰
桐枝高聳宿丹鳳
蓮葉半展巢金龜
和風微度寶箏響
永日徐轉簾陰移
西廂恍記舊遊處
素壁好在尋春詩
當年意氣不少讓
跌宕醉墨紛淋漓
宿醒未解字猶溼
人間歲月浩莫推
歎驚撫几忽夢斷
海角天遠難重期

夢海山壁間詩不能盡記以其意追補

碧海無風鏡面平
潮來忽作雪山傾
金橋化出三千丈
閒把松枝引鷓鴣行

又

海上乘雲滿袖風
醉捫星斗躡虛空
要知壯觀非塵世
半夜鯨波浴日紅

又

一劍能清萬里塵
讒波深處偶全身
那知九轉丹成後
却插金貂侍帝宸

又

春殘枕籍落花眠
正是周家定鼎年
睡起不知秦漢事

一尊閒醉華陽川

當食歎

黃鵠舉網收錦雉帶箭墮籍藻頽鯉鮮發奩蒼兔卧吾
儕亦何心甘味樂死禍貪夫五鼎烹志士首陽餓請言
觀其終孰為當弔賀八月黍可炊五月麥可磨一飽端
有餘努力事春鰥

睡鄉

有酒君勿吸入腸作戈矛有書君勿觀到眼生君愁不

如睡鄉去萬事風馬牛郊墟無來客風雨送暮秋苔甃
蟲唧唧霜林葉颼颼是時一枕睡不博萬戶侯斗帳栽
青氈重衾擁黃紬華山希夷翁千載可與遊

晨興

未旦雞三號將旦鵝羣鳴湖陂地曠快頗樂聞此聲回
首宦遊日鈴索攪五更未言簿書勞讒謗隨日生一饑
百憂散灑然懷抱清雨後初得薺晨庖有珍烹豈不念
加糝後汰恐易萌且當讀古書至味敵大羹

初冬從父老飲村酒有作

父老招呼共一觴，歲猶中熟有餘糧。
麴花漫漫渾如雪，豈羨離離未著霜。
山路獵歸收兔網，水濱農隙架魚梁。
醉看四海何曾窄，蘇子美詩云
吁嗟四海窄且復相扶醉夕陽。

懷南鄭舊遊

南山南畔昔從戎，賓主相期意氣中。
渴驥奔時書滿壁，餓鴟鳴處箭凌風。
千艘粟漕魚關北，一點烽傳駱谷東。
惆悵壯遊成昨夢，戴公亭下伴漁翁。

冬夜讀書

霜雪紛紛滿鬢毛，凋年懷抱獨蕭騷。
房櫳夜悄孤燈暗，原野風悲萬木號。
病卧極知趨死近，老勤猶欲與書鏖。
小兒可付巾箱業，未用逢人歎不遭。

余為成都帥司參議，成將軍漢卿為成都路兵鈐
相從無虛日。余被召出蜀，漢卿坐法謫居於涪，既
得自便，因卜築為涪人。今年廣漢僧祖成來山陰，
乃言嘗至永嘉樂清縣柳市之廣福寺，有黃先生

寓寺中煉丹及見則漢卿也余聞之感歎不已為
賦此詩

將軍胸中備文武鐵馬黃旗玉關路羌可滅心自知
富貴有命才可與奪官置之三硤空中猿鳥同朝暮
道逢奇士握手談明日家人不知處平生心事一丹竈
萬里生涯兩芒屨東嘉古寺卧高秋時有巢仙來叩戶
山中豈識故將軍但怪英姿凜不羣電眼蜎鬚長八尺
論丹說劍氣凌雲

雜題

松肪釀酒石根醉榭葉作衣雲外行指點人間一長嘆
秋風又到洛陽城

又

山家貧甚亦支撐時撫桐孫一再行朝甌米空烹芋粥
夜缸油盡點松明

又

羊裘老人只念歸安用星辰動紫微洛陽城中市兒眼

情知不識釣魚磯

又

黍醅新壓野雞肥
茆店酣歌送落暉
人道山僧最無事
憐渠猶趁暮鐘歸

又

釣魚吹笛本閒身
正坐微官白髮新
著屐此生猶幾緬
可令復踏九衢塵

又

山光染黛朝如溼川氣鎔銀暮不收詩料滿前誰領畧
時時來倚水邊樓

思蜀

思蜀寸心折歸吳雙鬢衰今年脫虎口昨夜夢驀顛死
隔平時友愁吟別後詩江山應好在誰記踏青期

又

一作劒關客閒遊將十年不嫌狂駭俗自許醉知天瑞
草溪橋路青衣野廟壩霜天獵歸處萬里入橫鞭

又

來從雲棧北行度雪山西故事談金馬遺蹤訪石犀閒
情淡於水豪飲醉如泥壞壁塵封遍何人拂舊題

又

玉食峨嵋餌金壺丙穴魚常思晚秋醉未與故人疎白
髮當歸隱青山可結廬梅花消息動悵望雪消初

余昔在健

為師伯渾王志夫張功夫王季夷瑩
上人輩以秋晚來訪樂飲旬日而去

散吏

卷二十三
拜賜明時散吏名頭銜字字敵冰清讀書有味聊忘老
賦祿無多亦代耕笠澤蓴鱸秋向晚緱山笙鶴月微明
人間樂事今真得莫恨推顏白髮生

題刻溪瑩上人梅花小軸

孤舟清曉下溪灘為訪梅花不怕寒忽有一枝橫竹外
醉中推起短篷看

夜夢遊驪山

秦楚相望萬里天豈知今日宿溫泉穿雲漱月無窮恨

依舊潺湲古縣前

溫飛卿詩云至今湯
殿水鳴咽縣前流

枕上

簷前查查鵲語輕窗櫺澹澹日痕生
清愁不逐爐香散
旋啜寒蠶解宿醒

五更讀書示子

近村遠村雞續鳴大星已高天未明
床頭瓦檠燈煜爚
老夫凍坐書縱橫暮年於書更多味
眼底明明見莘渭
但令骨肉尚枝梧半盞殘膏未為費
吾兒雖顛素業存

顏能伴翁飽菜根萬鍾一品不足論時來出手蘇元元
夜坐

天公似欲假餘齡鉞石年來幸小停微火煥爐娛獨夜
斷雲吐月縞中庭眼前樂事寒醅綠身後虛名蠹簡青
賴有古人同此志傷觀不用歎伶仃

卧龍

危磴盤紆上翠微倚天樓觀碧參差雨來海氣先橫鶩
風惡松柯盡倒垂孤鶻歸巢翅翎重斷鴻覓伴語聲悲


人間萬事難禁老醉撫闌干欲暮時

劍南詩豪卷二十三

謹案卷二十二第七頁前六行揚州渡江木蘭橈
刊本州訛江據唐宋詩醇改

第九頁後七行歸帆夜帶星按唐宋詩醇帶作戴
卷二十三第十五頁後八行蚊蠅埽迹葉飛初刊
本飛初訛初飛與韻不叶今改





總校官庶吉士臣張能照

校對官庶吉士臣羅修源

謄錄監生臣吳鏐